

東  
華  
續  
錄

東華續錄

乾隆三十九

臣王先謙敬編

臣周倫蕃恭校

乾隆十九年甲戌春正月甲寅諭軍機大臣等朕閱成衮扎布與達清阿所奏二人意見彼此不合夫爲將軍者必須和上下一眾志然後指麾士卒可冀致身奮勉有獲罪者將軍難免其咎有樹績者將軍功居首列至參贊佐理將軍亦關緊要見在達清阿一人帶兵駐紮烏里雅蘇台其職甚重若一切事務必待將軍指麾而行何事不誤準噶爾追逐車凌入卡復出一事伊等前後辦理不合大失機宜奉到訓飭之旨又復互相推諉希圖輕卸已罪尤屬不合成衮扎布等措置失宜其過尙小若將軍參贊不合各執意見以致誤公尙復成何事體伊等誠能覺悟前非諸務勇往和

衷其濟以期成事則功罪相抵朕容或加恩寬宥如不能遵奉諭旨奮力自贖則獲罪益深矣此時達清阿業經帶領烏里雅蘇台之兵起程尙屬勇往然達清阿惠木楚克扎布等恐不能相機籌辦著薩喇爾仍速行前往烏梁海查明辦理○戊午裁盛京牧廠正副總管歸翼長管理○丙寅調周人驥爲浙江布政使以湯聘爲湖南布政使由辰沅永靖道遷○庚午諭前經降旨禮部頒發僧道牒照復令各督撫歲終將所減實數據實奏聞此原欲毆游手爲良農略示沙汰之意耳乃十餘年來各省奏報不過具文從事且若輩卽盡令歸農安得餘田而與之轉不免無藉爲匪耳據實嚴查或致滋擾有名無實甚屬無謂此綜理日久所悉正不必襲復古闢邪之迹也著停止○辛未增修江南銅山縣月隄○壬申命廣東詹州萬州官員准五年報滿○丁丑欽差尙書舒赫德等奏參

贊大臣達清阿往擊擅入邊卡之賊瑪木特先遣侍衛齊克慎蒙  
固勒等偵探信息於正月十六日遣人誘至瑪木特達清阿設計  
令護軍校德明侍衛布雲布等於瑪木特來路安設二卡守候令  
公密什克護軍伊靈阿等各帶領馬步兵埋伏齊克慎等帶領瑪  
木特在薩拉布拉克邊卡之外引至達清阿住處遂將瑪木特等  
三十五人悉行擒獲臣等查問明白卽行押送赴京但瑪木特係  
準噶爾守界之人被我兵擒獲伊等不知瑪木特擅入邊卡情由  
或遣人索取亦未可定見令烏勒登將原帶兵五百名在邊卡附  
近緊要地方防範將達清阿等撤回得旨從前降旨原令達清阿  
領兵前往詢問瑪木特入卡情由應以理責其入卡之罪儻呼之  
不至或至而心懷不服有所抗拒卽以兵丁擒拏今但遣一使曉  
諭而瑪木特卽親身前來並無抗拒情形達清阿設計誘擒辦理

非是且蒙古人內名瑪木特者甚多並不詢其孰假孰真更極舛錯達清阿著來京候旨瑪木特恭順聽命著從寬免其從前冒昧入卡之罪賞給盤費釋放回巢○戊寅命四川錢局復設舊爐七座○己卯命革除廣西鎮安府土司役田陋規○以沈廷芳爲河南按察使

由山東登萊青道遷

二月壬午諭南巡閱視高堰毋增建行宮○癸未李因培以徇私

革職以于敏中爲兵部右侍郎

由內閣學士遷

○甲申以努三爲北路參

贊大臣○乙酉諭湖廣總督開泰奏截取舉人李兆龍看其年力

不特不堪知縣之任卽改補教職並恐難司訓迪已勒令休致咨

部等語知縣爲舉人應選之缺其有衰邁濫竽者自應慎重甄別

但改補教職已屬降等如改教後該員自委投閒志氣頽墮原可

隨時咨參卽其始尙堪訓士而遇俸滿及大計時量其年力更衰

不妨再令休致今開泰於截取之日未試以教職卽行淘汰雖曰加意甄別然若輩讀書上進卽年力才分各有所限而窮年苦志竟不獲一登仕版揆諸情理未免過當此正所謂過猶不及也朕綜理庶政務在持平未嘗稍有畸重畸輕之見若各督撫見有開泰此奏轉相倣效則又非造就人材之本意矣可通行傳諭知之李兆龍旣不勝知縣之任仍著以教職用○己丑諭軍機大臣等舒赫德等奏稱烏勒登呈報準噶爾之扎努噶爾布遣人移咨伊等烏勒登回稱爾等內亂難以容身爾達瓦齊如果遣使請平定準噶爾聖主必然惻念照所請行爾等方可永遠安生如果遣使毋再遲滯等語又奏成衮扎布等致書達瓦齊以數年未斷兵旅皇上常憫然憐念見在爾又爲台吉自此可享太平爾等杜爾伯特台吉等因慕聖君仁化投降爾等扎哈沁瑪木特及烏梁海宰

桑得木齊瑚圖克等率眾追入邊卡因此我已遣人將瑪木特等查拏爾等之扎努噶爾布反謂爲何將瑪木特設法拏獲夫我不遣兵第設法拏獲者特以罪在瑪木特一人與眾無涉如復遣兵爾等必又謾言大兵來討妄自驚亂且使無辜受傷如此酌辦行文等語此事前後辦理殊覺違礙瑪木特雖宜拏獲但不應用計誘擒其扎努噶爾布帶兵五千越嶺阻截車凌等及達瓦齊見爲台吉等語皆不可信烏勒登不審虛實卽與伊使者言達瓦齊如欲遣使投降天朝必與伊恩典亦屬太過成衮扎布等並不酌計卽咨行回文又太懦弱如此豈不令準噶爾人等笑我慮無人乎爾等將此急速移咨玉保僮準噶爾瑪木特尙未釋放可在瑪木特前將烏勒登呈報扎努噶爾布所寄之信烏勒登回答之言成衮扎布寄與達瓦齊之書伊已一一奏聞皇上洞鑒一切知爾等

皆因準噶爾內亂互相戕害值我大國未卽加兵之際聲言如此以欺我駐邊將軍大臣而已豈知我大國之例伐有罪而撫善良他人被逼來降斷無不留養之理乘人亂而急稱兵無是理也爾處之人如有來降者在爾境內或可追迫我之邊卡斷不可入嗣後爾等惟當在遊牧處安靜守法儻不嚴束爾等屬下之人有妄入我之卡者一有所獲卽行正法決不寬貸此因誘汝擒執故釋放遣回爾等如有傳喚不來或拏獲抗禦者必嚴加懲治斷不釋放再阿爾台邊境地方原不許人居住今將邊境分晰明白另行經畫如此明白曉諭瑪木特知之若此時已將瑪木特釋放玉保可卽親赴邊卡遣人將瑪木特喚回宣旨曉諭並傳諭舒赫德等知之○諭薩喇爾領兵前往科布多地方擒獲準噶爾烏梁海得木齊扎木參收凌伯克博羅特等努三亦將得木齊瑚圖克擒獲



薩喇爾感戴朕恩遵奉指示領兵前往烏梁海擒獲扎木參等無忝任使甚屬可嘉若如達清阿誘擒瑪木特則甚虧大國體統矣薩喇爾著加恩補授內大臣努三去時原有畏葸之意曾降旨訓飭此次擒拏瑚圖克尙屬奮勉自可寬宥前愆貝勒額琳沁公恭格敦丹車登薩木丕勒等協同效力亦屬可嘉著交部議敘○庚寅舒赫德等奏正月二十五日薩喇爾努三等拏獲擅入邊卡之烏梁海得木齊扎木參瑚圖克等於三十日解至大營臣等卽交與侍衛陽格等解送京師於二月初一日自扎布堪起程得旨舒赫德所辦甚屬錯謬前者瑪木特乃係達清阿誘執並非兵力所擒是以朕施恩放回若達清阿亦如薩喇爾等奮勉前進拏獲瑪木特亦無放回之理今扎木參瑚圖克旣被我擒獲豈得與瑪木特一體辦理舒赫德見不及此謬誤已極朕實不意舒赫德竟至

如此朕甚愧之薩喇爾見在科布多地方守候收服烏梁海等信  
息甚爲得當而舒赫德等又命薩喇爾能服烏梁海則服之儻事  
機未甚順利不必勉強如此責成使人何以遵行朕信任舒赫德  
而伊反豫存畏蕙之心諸凡怯餒而又牽制於成衮扎布朕實不  
解今伊等以爲答書達瓦齊卽解人疑可以罷兵一面遣人收服  
烏梁海不知掩耳盜鈴非徒不解人疑適足貽誚於人耳朕今遣  
兆惠往迎扎木參瑚圖克傳諭伊等妄進邊卡之罪無可寬宥卽  
將扎木參等解回軍營牢固監禁俟烏梁海事定再行請旨辦理  
如有逃脫等事惟舒赫德成衮扎布等是問○壬辰 上啓鑒謁

東陵○乙未

上謁

昭西陵

孝陵

孝東陵

景陵至

孝賢皇后陵奠酒回鑾○丙申諭張泰開將鄒一桂之子保舉學  
正顯係瞻徇已降旨交部嚴加議處鄒一桂之子若出自他人保

舉容可諉爲不知張泰開既係同官日與共事豈有不知之理鄒一桂自應一併交部議處著吏部詢明察議具奏○丁酉免追岳鍾琪子岳濬未完銀兩○命軍營領兵大臣專摺奏事○戊戌諭據舒赫德等奏準噶爾達瓦齊復作台吉烏梁海等不願歸順一時難以收服已令薩喇爾暫駐卓克索地方宣揚兵勢另籌辦理等語舒赫德等前後所奏情形竟未喻辦理此事之旨朕不解舒赫德何以至此前令將烏梁海收降招服者非因達瓦齊訥默庫濟爾噶爾彼此構釁乘亂而始辦也特因烏梁海等追逐車凌直入我卡若不懲治必致肆意妄行且烏梁海等亦緣近處阿爾台之內故得侵犯我卡若驅之於阿爾台之外雖欲侵犯豈能猝至是以令於此時或許歸降或行驅逐一經辦定於地方長久有益原與達瓦齊之復作台吉與否全無關涉無論此時達瓦齊與訥

默庫濟爾噶爾內亂之時即使噶爾丹策零尚在遇此機會亦當  
爲廓清地方從長辦理更有何疑朕曾降旨軍營將軍大臣毋得  
偏執己意致令薩喇爾辦理周章今觀此奏豈非故掣其肘乎若  
謂薩喇爾馬力疲乏卽令其在駐紮處暫爲休息未始不可達瓦  
齊復作台吉之處何必齒及此尤朕所不解也再瑪木特已經釋  
放伊若感恩自必來歸如不歸誠必將此事告知伊台吉其台吉  
豈肯晏然卽已勢必遣使前來索取逃人車凌等彼時非發兵征  
討更無善策在舒赫德等以爲既將瑪木特釋放若扎木參等亦  
照此釋放便可無事獨不思堂堂天朝有如此辦理之法乎今準  
夷正值力弱舒赫德尙如此畏怯若遇彼猖獗時伊等不過歸入  
喀爾喀一籌莫展而已俟烏梁海辦竣之後瑪木特若不來歸亦  
必一律辦理今應如何防範瑪木特之處亦宜豫爲留心此時惟

遵朕屢次所降諭旨飭諭薩喇爾悉心妥辦舒赫德儻再行從中阻撓決不寬恕其罪○庚子禮部議覆福建巡撫陳宏謀奏蘇祿國蘇老丹嘛喊味安柔律隣遣使附搭閩人楊大成船隻入貢等語查該國於雍正五年始奉表通貢至乾隆七年復修貢職茲該國王遣使嘮獨萬喳喇等齎捧表文方物來閩應如所請給夫馬勘合委員伴送來京所帶土產貨物聽該夷照例貿易免徵關稅惟查該國以楊大成列爲副使楊大成卽武舉楊廷魁緣事被斥復藉出洋貿易冒充該國副使若不嚴加懲儆恐內地民人習以爲常出洋滋事不應如該撫所題僅交原籍管束請照例改發黑龍江充當苦差並行文該督撫知照該國王嗣後凡內地人在洋貿易之人不得令承充正副使至該國王願以地土丁戶編入天朝圖籍伏思我朝統御中外荒夷向化該國土地人民久在薄海臣

服之內該國王懇請來年專使齎送圖籍之處應毋庸議從之○  
辛丑諭吏部議張泰開鄒一桂均予以降調甚屬徇庇蓋二人罪  
不同科如該部嚴詢鄒一桂果有請屬情弊則二人之罪豈降調  
斥革所可了事今旣稱止於不行阻止則其罪自應分輕重且張  
泰開之心以按例保舉朕未必卽知其爲鄒一桂之子故朦朧薦  
剋瞻徇行私此而不罰則黨援門戶之漸將自此啓是以特令嚴  
加議處今該部之議所謂嚴者何在且旣爲二人開脫又俱議以  
降調朕能聽大臣之曲庇專擅乎此本擲還另議吏部堂官著交  
都察院嚴察議奏尋議署吏部尙書楊錫紱侍郎鄂彌達歸宣光  
憲中裘曰修均應照溺職例革職鄒一桂照不應重私罪例降三級調用  
議張泰開照溺職例革職鄒一桂照不應重私罪例降三級調用  
得旨張泰開著革職鄒一桂著降三級從寬留任○癸卯召策楞

來京○甲辰 上還京師○己酉命策楞赴軍營

三月辛亥朔 上幸履親王第視 定太妃疾○召顧琮來京以

白鍾山爲河東河道總督○壬子諭據舒赫德奏稱準噶爾烏梁

海等已遠過唐努山徙至俄羅斯接壤地方居住再阿睦爾撒納

與達瓦齊構釁阿睦爾撒納同訥默庫等俱欲前來投順見在阿

爾台雪大阿睦爾撒納未得前來等語烏梁海等見在被逐在阿

爾台以外而又遇堵禦來投之阿睦爾撒納無處容身前往潛避

至唐努山阿勒坦諾爾等處已屬窮困烏梁海人惟恐令伊遷徙

耳今如准其投順後每年進貢減半不令遷徙自必傾心歸順前

已降旨令薩喇爾辦理著將此旨仍交與薩喇爾等遵照曉諭安

協辦理○以徐以烜爲禮部侍郎

由內閣學士遷

○癸丑以程景伊爲內

閣學士

由詹事遷

○丙辰命侍郎兆惠協理軍營事務舒赫德成衮扎

布薩喇爾來京面領諭旨喀爾喀親王額琳沁多爾濟管理喀爾喀兵丁事務貝子車木楚克扎布公齊旺隨同策楞辦事○免黑龍江莊丁雍正十三年至乾隆十八年舊欠穀石○庚申諭據黃廷桂奏提督岳鍾琪因逆匪陳琨一案發覺力疾前赴重慶督緝要犯擒獲過半始行回蜀中途病故等語岳鍾琪宣力有年勞績懋著茲以督緝匪犯力疾親往奮勉可嘉患病溘逝深爲悼惜前伊子岳濬巡撫任內應完庫項不敷銀四千九百餘兩已降旨加恩免其追繳其已經抵交估變之產著再加恩悉予給還所有應得卹典仍著察例具奏尋予祭葬諡襄勤○癸亥慧中以年老休致以蘇昌爲吏部右侍郎原任廣東巡撫○丙寅以金德瑛爲內閣學士

由太常寺卿遷

○丁卯

上幸南苑行圍

○戊辰命北路軍營仍駐烏里

雅蘇台○甲戌軍機大臣等遵旨議奏凡有事於園丘方澤



祈穀 雩祭應陪祀各官向例於前期四日齊集午門外聽宣  
敕諭行之日久徒存具文嗣後請令在京大小各衙門赴內閣恭  
錄敕諭製牌繕寫敬謹收貯每遇 兩郊大祀於致齋日期敬謹  
安設俾仰瞻之下時懷恪虔較之宣讀一過更爲親切其宣讀敕  
諭儀注即可停止得旨是○乙亥 上親耕藉田○丁丑諭八旗  
奴僕受國家之恩百有餘年邇來生齒甚繁不得不酌爲辦理是  
以經朕降旨將京城八旗漢軍人等聽其散處願爲民者准其爲  
民見在遵照辦理至各省駐防漢軍人等並未辦及亦應照此辦  
理令其各得生計所遺之缺將京城滿洲派往而京城滿洲亦得  
稍爲疏通矣著交總督喀爾吉善會同福州將軍新柱將彼處漢  
軍人等或亦照京城漢軍之例各聽其散處經營或將軍標綠旗  
營兵缺出將伊等轉補所出之缺卽將京城滿洲兵派往頂補則

京城滿洲既得以疏通而本處漢軍等於生計之道亦得自由誠爲兩便著喀爾吉善新柱熟籌妥議具奏

夏四月庚辰朔諭尙書劉統勳汪由敦總督方觀承鄂容安喀爾吉善開泰永常黃廷桂碩色宣力中外夙夜靖共嘉乃純勤宜加顯秩劉統勳汪由敦俱著加太子太傅方觀承喀爾吉善黃廷桂俱著加太子太保鄂容安開泰俱著加太子少傅永常碩色俱著加太子少保○諭軍機大臣等來降台吉車凌等一百六十餘人各求前赴熱河瞻仰朕躬但此內有台吉色布騰見在軍營辦理招服烏梁海事台吉色布騰人明白有才具朕早知之著於今年暫留軍營辦事令在參贊上行走俟明年朕巡幸木蘭之時令伊再來至車凌烏巴什等遵旨於所屬人內選兵二百名令率桑和通瑪什等率領俱交與色布騰帶赴軍營調遣○辛巳命王府不

得罰護衛官員俸○戊子 皇后行躬桑禮○庚寅諭舒赫德等  
奏覆調遣額林沁格勒克巴木丕勒往達清阿隊內額林沁前至  
波爾霍濟因骹疾告存格勒克巴木丕勒前至西爾哈戈壁以內  
地方告存奉諭查訊緣由而伊等實無可置辨但格勒克巴木丕  
勒在薩喇爾隊始終奮勉額林沁同努三擒拏瑚圖克亦爲奮勉  
懇請贖罪等語舒赫德成衮扎布此奏甚屬錯謬朕前此因二人  
調往達清阿隊內未經前往是以降旨將額林沁革去貝勒仍給  
公爵格勒克巴木丕勒罰俸三年此亦因係糊塗蒙古非內地人  
員可比是以格外寬貸伊等若係內地之人必且明正典刑豈有  
如是結局之理乎且此事舒赫德成衮扎布早應參奏參奏後或  
治罪或寬免皆在朕耳乃竟爲姑容及朕飭令查問又指稱二人  
奮勉之處代爲奏請贖罪試思軍務獲罪豈有准贖之例乎今正

值軍興有事賞罰嚴明之時伊等屢屢蒙昧姑息朕竟不知何故  
且成衮扎布自授將軍以來辦理諸務委靡懦弱致使喀爾喀等  
藐視眾志不服夫定邊左副將軍之職初係由內廷大臣中簡放  
前因額駙策凌人明白勤勉特授爲定邊左副將軍額駙歿後朕  
以成衮扎布人尙去得又已撤兵卽令居此職辦軍營事務見值  
有事之秋非懦弱所能勝任成衮扎布著授爲喀爾喀副將軍效  
力贖罪伊若能改過事定之時將伊仍復補授或由他喀爾喀之  
中簡放臨時朕另降諭旨今成衮扎布業經革去將軍卽應銷其  
以前錯辦之罪著從寬免其交部○以策楞爲定邊左副將軍○  
辛卯召班第來京以楊應琚署兩廣總督郭一裕署山東巡撫調  
彭家屏爲江蘇布政使以納世通爲雲南布政使○甲午 上詣

黑龍潭祈雨○丁酉諭舒赫德此次差往軍營辦理一切錯謬

從前行文準噶爾達瓦齊一事自應奏聞請旨遵行乃一而具奏  
一面卽行擅發甚屬錯誤會將應行察議之處暫令存記今令伊  
查奏原任貝勒額林沁公格勒克巴木丕勒未至調遣地方一案  
伊等公然爲之奏請寬免此等奏調遲誤之罪軍務攸關豈得因  
其會效微勞卽從寬宥乎況此原係應行查參之事乃並未參奏  
已屬寬縱及朕諭令查奏復巧爲開脫舛錯已極著交部將伊前  
次存記之案一併嚴察議奏尋議革職得旨舒赫德著將從前所  
有加級紀錄盡行銷去從寬免其革職○己亥 上詣 黑龍潭  
祈雨○壬寅命國子監學正學錄等官照內閣中書例考試○丙  
午以都統德齡爲北路參贊大臣○己酉改江西贛州府屬甯都  
縣爲直隸州轄瑞金石城二縣○改江南蘇松鎮右營等五營遊  
擊爲都司○江西巡撫范時綬奏請飭部定議通行各省嚴禁私

錢得旨不但各省不必卽汝江省亦尙在可緩之事使官錢充裕何必使私錢若不充裕並此私錢亦不令使則民將使何物大凡錢之一事越辦理越見貴今直隸不辦理而惟查囤積乃大減價於前若不查囤積及私鑄私銷而惟禁私錢是不治其本而治末之見大不可者

閏四月庚戌朔賜莊培因等二百三十三人進士及第出身有差○庚申冊封貴人戴佳氏爲忻嬪○壬戌命蒙古侍衛巴雅爾

赴直隸順德府祈雨○甲子諭我內扎薩克與外四部落及眾喀爾喀扎薩克地方各按旗分部落設立正副盟長管理遊牧事務今將新來投誠之厄魯特台吉車凌等帶來戶口俱編設旗分佐領旣與內扎薩克喀爾喀扎薩克等相同應將車凌授爲盟長車凌烏巴什授爲副盟長台吉色布騰協辦盟長事務其盟會著賜

名爲杜爾伯特賽音濟雅哈圖部落○撥部庫銀十萬兩交熱河備賞○丁卯議政大臣等議覆閩浙總督喀爾吉善等奏浙省海塘見在沙漲每日兩潮並不到塘與塘工無礙無須道員專管應如所請將海防道裁汰仁和海鹽平湖三縣塘工歸併杭嘉湖道兼管蕭山山陰會稽三縣塘工歸併甯紹台道兼管從之○己巳高堰隄成○辛未厄魯特台吉色布騰入覲命大學士公傅恆至張家口傳旨迎勞加封貝勒○壬申京師雨

五月辛巳調吳士端爲貴州布政使以史奕昂署甘肅布政使○壬午諭軍機大臣等據永常奏準噶爾夷使已抵橋灣見在即可入關且據該夷使言於起程時業已派出貿易頭目亦於六月間可到等語從前準夷部落准其通貢貿易原係加恩噶爾丹策零其後策妄多爾濟那木扎勒喇嘛達爾扎繼立因係噶爾丹策零

之子孫是以仍前辦理至達瓦齊篡立則係伊之僕屬矣今伊貢使前來若仍前相待我朝當全盛之時國體攸關不應委曲從事以示弱於外夷若少示貶損準夷素性猜疑陰懷叵測將來必致構釁滋事不得不先爲防範況伊部落數年以來內亂相尋又與哈薩克爲難此正可乘之機若失此不圖再閱數年伊事勢稍定必將故智復萌然後備禦倉卒其勞費必且更倍於今况伊之宗族車凌車凌烏巴什等率眾投誠至萬有餘人亦當思所以安插之朕意機不可失明歲擬欲兩路進兵直抵伊犁卽將車凌等分駐遊牧眾建以分其勢此從前數十年未了之局朕再四思維有不得不辦之勢所有明歲軍興一應糧餉兵丁馬駝均應豫爲籌畫其西路所調兵丁約需二萬此內欲撥甘涼綠旗兵八千及西甯涼莊西安歸化城土默特察哈爾以及新降厄魯特兵共合三



萬之數如此辦理似已足敷調遣或有另行辦理之道著永常詳  
細籌議速行具摺馳奏候朕酌定將來十月內朕另降諭旨令永  
常策楞等來京將一應機宜面加訓諭至陝甘見辦軍需鄂樂舜  
恐不能辦理裕如已特派鄂昌前往並令史奕昂署理甘藩以資  
協助可一併傳諭知之○甲申 上奉 皇太后率 皇后恭詣  
盛京展謁 祖陵啓鑾○乙酉免經過直隸奉天地方額賦十分  
之三○庚寅 上奉 皇太后駐蹕避暑山莊○諭杜爾伯特台  
吉車凌車凌烏巴什等皆準噶爾渠帥嚮慕德化率領萬眾傾心  
來歸甚屬可嘉應施恩賞給封號以示懷柔至意其台吉車凌封  
爲親王車凌烏巴什封爲郡王車凌孟克色布騰封爲貝勒孟克  
特穆爾拜音珠爾根敦封爲貝子巴圖孟克瑪什巴圖封爲公達  
什敦多卜恭沙喇巴爾封爲頭等台吉均授爲扎薩克其所部人

戶如何編次旗分佐領補放官職之處俱已降旨令王保麒麟保等辦理著該部照例遵行車凌等受朕厚恩務將所屬人等約束教養安分謀生果能仰副朕心遵循訓旨則永沐朕恩於無旣矣慎之勿怠○壬辰以厄魯特公巴圖孟克爲北路參贊大臣瑪什巴圖爲西路參贊大臣○癸巳理藩院尙書納延泰等帶領達瓦齊使臣敦多克進見 上曰汝台吉達瓦齊之事朕已盡知今遣汝來一切推誠實言爲是今乃以欲如噶爾丹策零闡揚黃教安輯羣生等語入奏殊屬無謂達瓦齊弑噶爾丹策零之子喇嘛達爾扎奪取台吉之位又與訥默庫濟爾噶爾等構釁糜爛準部生靈又將喇嘛等破戒還俗有如此闡揚法教安輯羣生者乎從前喇嘛達爾扎殺其弟而代之朕卽不以爲是然以彼終係噶爾丹策零之子是以弗替舊恩今達瓦齊殘害喇嘛達爾扎奪其基業

是噶爾丹策零之仇讎也又安得以法教羣生爲詞乎又云欲爲策妄多爾濟那木扎勒等遣人赴西方念經從前喇嘛達爾扎奏請遣人赴西方朕尙未允行今反允達瓦齊之請乎諒達瓦齊亦知所奏難行一則自占身分欲照前例通行貿易二則遣使請安藉此窺探意指若允其請漸且奏請別事顯係如此嘗試伊若推誠祈恩或可再議若似此狡飾具奏於伊事無益爾等歸時將此旨曉諭達瓦齊知之敦多克奏言前大皇帝降旨永守和好不渝舊盟噶爾丹策零將準噶爾法教付之策妄多爾濟那木扎勒喇嘛達爾扎分非應立僅以百戶安置邊徼乃殺其弟而代之干犯法教是以達瓦齊不服統眾而居其位臣奉使來時命臣云大皇帝若詢及此事宜明白陳奏至喇嘛還俗乃一二不肖之人譏閒眾諾顏等干犯法教因而治罪並非盡行還俗也上曰汝

處令喇嘛等還俗眾莫不知爾不必諱言再汝等此次至我卡倫時曾稱有口奏機密之語及理事官索訥木詢問爾等乃云並無口奏之言而疏內又稱尙有數語口奏顯係汝等自相矛盾果有欲言可於朕前實奏敦多克等奏言疏內所稱有數語口奏者乃謂大皇帝若摘問疏中之言命臣明白陳奏耳疏外實無另行具奏之事上曰據汝稱疏外並無另行具奏之言疏內又無他語無庸詢問然則遣汝等至此者明係命汝等窺探情形若易於進言則索取新降之杜爾伯特車凌等若事覺難行卽止耳敦多克奏言大皇帝若俯賜矜全此等情節亦曾命臣等提及上曰達瓦齊從前爲喇嘛達爾扎所迫欲來歸附爲車凌烏巴什之兄達什所阻逃奔哈薩克達瓦齊自篡爲台吉後將達什執而囚之彼時達瓦齊若歸降於朕朕亦照車凌一體施恩豈有歸之準

噶爾之理乎杜爾伯特車凌等乃達瓦齊一體之人既已投誠於  
朕達瓦齊安得索之此斷不能行況達瓦齊係孤負噶爾丹之恩  
絕其嗣續奪其基業之仇讎朕尙爲不平汝等皆其臣僕世受深  
恩乃絕少悼惋之意甯無愧於心乎敦多克氣懾詞阻奏言 大  
皇帝諭旨明如皎日無微不照洞悉隱懷臣等復有何言 上曰  
達瓦齊疏內所奏朕已明白降旨汝等同時自有諭旨齎去今筵  
宴新降之杜爾伯特車凌等汝等一同入宴共觀百戲敦多克叩  
頭謝恩而退○戊戌命刑部尙書劉統勳馳往肅州協辦陝甘總  
督事○調陳宏謀爲西安巡撫鍾音爲福建巡撫○己亥召雅爾  
哈善來京調鄂樂舜爲浙江巡撫以鄂昌爲甘肅巡撫○以來年  
勦準噶爾命北路派兵三萬西路派兵二萬採買駝馬羊隻聽候  
出師○諭內扎薩克喀爾喀王貝勒等整兵聽調○庚子兵部議

覆安徽巡撫衛哲治奏查三流道里表內各省通發惟不載直隸府分緣畿輔之地非可爲外省流所而軍衛道里表尙沿舊載順天保定河間天津等府名目茲值纂修會典可否刪去四府名目以昭畫一等語應如所請移知會典館照辦嗣後並請將外省軍犯編發直隸府州之處永行停止從之○辛丑命撥山東山西河南耗羨銀兩於直隸修城○命侍郎兆惠往歸化城辦運軍米○乙巳諭軍機大臣等近有瑪木特約會阿睦爾撒納投誠之信伊等如來投誠卽當安插在阿爾台以內將我卡倫向外展放軍營向前安設一則易於收受投來之人查管伊等遊牧二則明年進兵路亦較近著傳諭策楞等妥協辦理至明年進兵時如有從彼投來之人應將四衛拉特議編四部封汗另居之處且勿向彼說知止將各按伊等品級分別封爵安居本地俱爲大皇帝臣僕等

語曉諭再朕聞阿睦爾撒納之爲人詭詐反覆全不可信若果率伊妻子前來投誠詭計亦無所施但防範不可不周策楞等務須留心覺察謹慎辦理仍勿令其知覺○丙午命撥部庫銀三百萬兩交北路軍營○戊申准直隸各州縣廳衛庫酌貯銀兩備用並霸昌等六道永平等五府俱酌撥分貯

六月己未諭軍機大臣等將軍策楞等奏稱瑪木特所遣鄂勒哲依哈什哈來至卡倫向侍衛六格等告稱達瓦齊使沙克都爾濟台吉爲首領兵三萬徑征阿睦爾撒納訥默庫已將伊等遊牧劫奪又使名塔爾巴什者由烏梁海調兵三千又將阿睦爾撒納訥默庫牧羣收取阿睦爾撒納訥默庫帶領千人在額爾齊斯夔博和碩地方固守此際不識如何阿睦爾撒納如在必來投順天朝等語阿睦爾撒納等如來歸附所有聲援接應以及迎禦準噶爾

追兵在在所關緊要杜爾伯特貝勒色布騰內大臣薩喇爾於伊等性情及彼處事宜均爲熟悉著將策楞所奏之摺以蒙古語譯出發給伊等薩喇爾看畢卽行起程來赴熱河時當潯暑不必趨行到後俟朕面問情形訓飭後再行前赴軍營色布騰之遊牧旣與軍營相近接見此書一面奏覆繕寫蒙古文由驛馳送一面卽行起程會同將軍策楞公同商議辦理卽由彼前赴卡倫相機而行色布騰此行將伊親信之人多帶以備差委此項帶往之人著策楞務將路費等項寬爲備給無事之時再各回原處將此亦寄信策楞知之○甲子命王大臣揀選本科武進士○戊辰諭軍機大臣等據麒麟保奏車凌孟克之子巴朗帶領三百人逃竄伊等甫經投順復又逃亡情殊可惡伊父車凌孟克方赴熱河未回巴朗卽背父潛逃其中必有別情著卽傳諭策楞等速派弁兵堵截



各卡倫路徑卽時擒獲詢明實情將巴朗及同逃之台吉等押解來京其隨從同逃之屬下人等不必治罪仍交與車凌孟克加意約束車凌孟克等前赴熱河原令色布騰照看游牧今適因色布騰前往麒麟保駐紮處議事之際伊等卽行逃竄看來伊平日管轄眾人尙知法紀今又前往軍營著策楞等將朕此旨曉諭色布騰令其領兵追擒務期弋獲○壬申諭兆惠見在出差其戶部侍郎事務著雅爾哈善署理在軍機處行走○諭軍機大臣等永常議奏進剿官兵器械糧餉摺內裹帶官兵跟役口糧至米麪數百萬斤此係前岳鍾琪所辦乃相沿綠旗陋習已屬失策况此番情形與前更自不同見在進夷內亂相尋人心離畔以天朝餘力乘機進取正所謂取亂侮亡之時若裹帶米麪數百萬斤馱載前往則兵丁防護不暇何能輕騎進剿且與蒙古接戰惟應仍用蒙古

行走之法加以官軍節制足矣若輜重爲累不得鼓勇直前反啓  
準夷窺伺攘奪之心豈非轉資盜糧耶已據軍機大臣等議另行  
籌辦可將此傳諭知之○癸酉調圖爾炳阿爲山東布政使葉存  
仁爲河南布政使由浙江調○乙亥諭軍機大臣等據將軍策楞等奏  
稱厄魯特孟克特穆爾亦同巴朗等潛逃孟克特穆爾乃台吉額  
默根之兄今孟克特穆爾旣逃額默根不便令其仍往游牧著將  
其屬下人等俱交與車凌等用心照管○是月甘肅巡撫鄂昌奏  
征兵出塞路經沙磧無水之地難免乾渴查前此軍需有辦給菓  
單一條菓單一物能生津止渴出口之兵各帶一分經過無水處  
所所益殊多此係甘州產菓一種名曰秋子八月半後菓熟之時  
可製作成單見飭令甘州府製造二百斤辦用再北路兵亦應需  
用豫先辦就三百斤於冬初解京轉交北路軍營應用得旨甚好

又奏查由陝至甘原有兩路一由陝西沿邊一帶自安邊靖邊入甯夏之花馬池由甯夏至涼甘肅一由陝西之邠州長武至甘肅之涇州由涇州至蘭州前往涼甘肅但涇州一路必經由鞏昌府屬之會甯安定二縣地處山隈並無井口鄉民俱食窖水偶值天旱卽水無所資是以商販皆不從此路而行若大隊官兵更不宜從此行走查西安之西南有大路一條由陝省之隴州進甘省之清水縣界由秦州伏羌抵蘭州一路水皆充裕程途雖遠百餘里路極平坦惟中間隔一官山不甚險峻上下頗便是以從前官兵亦由此路行走得旨軍機大臣議奏尋議據稱由隴州秦州伏羌一路軍行爲便應請交與總督永常及陝撫陳宏謀甘撫鄂昌等再行查明此一路地方應調撥何處管驛馬匹設撥遞送並派委官員豫備供應如何辦理之處會商妥辦再行奏聞從之

東華續錄

臣周澐  
謹奏校

秋七月辛巳諭山西巡撫恆文所題陽曲縣烈女韓開姐請旌一本內稱開姐自幼聘與王朝藩爲妻夫死誓不再適嗣伊父母以壻亡多日央媒另聘開姐遂自縊身死等語閱其情節開姐初志在於守節本可不死其死也皆伊父母貪得另聘財禮迫之使然耳迨至其女自縊又復具呈請旌冀領坊價所領尙浮於伊殯葬之費且領價之後建坊與否均未可知是國家綽楔之典適以飽伊不肖父母之慾橐於維持風化之道未爲有裨而轉以滋弊若謂未婚之女能矢志靡他捐軀就義或該撫酌量製給扁額發交本宅懸挂亦足慰貞魂於地下不必專疏請旌給與坊價嗣後各

省有似此者卽著照此辦理此本著發還毋庸交部並傳諭各省  
督撫知之○壬午 上奉 皇太后率 皇后自避暑山莊啓鑾  
詣盛京○癸未以塔勒瑪善扎勒杭阿爲北路參贊大臣○甲申  
命撥山東等省銀一百萬兩部庫銀二百萬兩交西路軍營○丙  
戌諭貝勒車布登與安崇阿德甯同駐庫克嶺專爲防範逃眾乃  
巴朗從此脫逃伊等率兵尾追並不奮勇前進卽行退歸安崇阿  
德甯二人著卽正典刑車布登著革去貝勒降爲貝子仍留軍營  
效力贖罪○丁亥諭軍機大臣等尹繼善等奏稱南河虧空人員  
限期將滿兩月以來竭力追比多有力不能完者陳克濬等八犯  
應於七月二十八日正法羅綸等二犯應於九月初五日正法其  
未完銀兩著落各家屬追繳並查家產變抵償不足數仍著落高  
斌張師載賠補等語已於摺內批示矣可著尹繼善嚴行傳諭高

斌張師載南河虧空之案實由伊二人所致陳克濬等雖經正法而未完帑項尙有十數萬之多不於高斌張師載是問而誰問使各犯家貲尙可措繳自必依限完納以冀保全首領今該犯等既伏厥辜卽嚴比家屬查變家產亦屬有名無實是此未完之項豈可終歸無著耶伊二人上年曾有以二萬金贖罪之請此何等罪可以言贖且亦思各犯虧空至十數萬金是卽伊二人之虧空而乃欲以二萬金贖罪是何言耶伊二人係上年卽應正法之人朕格外加恩特予寬宥苟有人心自當感愧奮勉力爲籌度俾各犯虧空早完且各犯之力能全完與否及完至若干分數伊二人自所悉知乃一年以來安坐南河毫無措置竟若與己無涉者不知伊二人尙何所待必待至與各犯相繼正法耶如謂陳克濬等已罹大戮伊二人卽更拖延尙復希冀倖免豈國家憲典獨爲陳克

濬等數微員而設乎勿致後悔無及也尹繼善傳諭後看其言語情形據實具摺奏聞尋奏據高斌等稱陳克濬等未完帑項見在趕緊清完羅綸等帑項如限內不完亦卽照數完繳報聞○命公車布登扎布馳赴軍營○己丑諭軍機大臣等策楞等奏據烏梁海宰桑都塔齊稟稱達瓦齊與阿睦爾撒納互相攻擊將阿睦爾撒納遊牧搶奪阿睦爾撒納帶領妻子奔入博勒博勒濟蒿據險居住隨令烏勒登藉稱行圍帶兵前往喀喇阿濟爾罕等邊卡爲阿睦爾撒納聲援並令坐卡侍衛有信卽行呈報等語阿睦爾撒納乃最要之人伊若來降明年進兵大有裨益想薩喇爾此時亦至軍營將如何接援之處著傳諭策楞等會商妥協辦理○辛卯上幸敖漢固山貝子垂濟扎勒第○上臨奠敖漢貝勒羅卜藏墓○丙申免四川郭羅克番民舊欠○丁酉諭軍機大臣等據

策楞等奏輝特台吉阿睦爾撒納等攜帶眷屬四千餘戶前來投誠阿睦爾撒納係準噶爾大台吉今與達瓦齊離異輸誠歸順深可嘉憫著貝子扎拉豐阿帶乾清門侍衛德善集福等齎賞賚之物前往降旨再命陸喇爾自軍營前往迎勞阿睦爾撒納頒以恩賞將來冬令朕自盛京回鑾時仍派玉保照管阿睦爾撒納帶至熱河令彼瞻仰乘此便道將色布騰亦帶至熱河並傳諭玉保前往軍營迎勞阿睦爾撒納時暫在彼處照管游牧辦理事務俟應來時候諭旨遵行阿睦爾撒納係何等人相見有何言辭應詰問之處俱著詳悉詰問具奏○戊戌諭軍機大臣等阿睦爾撒納從前兩次遣來之人俱被準噶爾烏梁海阻回甚屬可惡或今年卽發兵剿滅或俟明年進兵時攻擄以充口糧並包沁扎哈沁人等應如何辦理著策楞舒赫德等會同悉心妥議具奏再阿睦爾撒



納翰誠來歸卽爲朕之臣僕所有進兵之事伊有所見俱著告之  
軍營將軍大臣等公同商酌妥協辦理至其帶來之厄魯特若俱  
係舊屬諒無可慮或有新近擴來之人良莠不一疑畏潛逃洩我  
軍情似宜將此項人等移在卡內派親信宰桑照管應否如此著  
會同將軍大臣等酌量妥辦可卽傳諭將道策楞等知之○己亥  
上駐蹕彰武臺河東大營奉 皇太后御行幄額駙色布騰巴  
勒珠爾等進宴○庚子諭據策楞等奏喀爾喀台吉丹巴扎布聞  
知巴朗等將欲逃走並不親往查驗既逃之後又復推故不前以  
至巴朗逃脫請將丹巴扎布在軍營正法示眾等語喀爾喀人等  
素畏厄魯特比年以來並無軍務朕念伊等俱係蒙古凡事寬恕  
以致喀爾喀等相率玩愒方今用兵之際非平時可比此等違誤  
軍機選懦無能之人若不明正典刑何以肅軍紀而勵戎行丹巴

扎布著照策楞等所請卽在軍營正法此旨通諭喀爾喀各王公  
扎薩克台吉官兵等知之○諭軍機大臣等據策楞等奏七月初  
八日阿睦爾撒納已進邊卡共兵五千餘名婦女人眾約共二萬  
請簡派大臣帶領蒙古王等照看辦理等語昨聞阿睦爾撒納歸  
順已特派侍郎玉保並賞給唐喀祿副都統銜同往料理伊等遊  
牧事務俟玉保到時令同努三德沁扎布等悉心經理阿睦爾撒  
納領兵至五千餘名人口眾多口糧必至不繼著將軍營所有牲  
畜及歸化城運到米石並軍營存貯糧餉內酌量動用賞給若必  
俟奏聞後賞給恐已緩不濟事策楞等卽曉諭朕嘉惠伊等遠方  
輸誠納款之意一面給發一面奏聞再阿睦爾撒納等帶來牲畜  
馬匹自必疲乏策楞等亦應善爲曉諭令其加意牧放以備明年  
進兵之用其食用所需牲畜另於軍營豫備羊隻內給發亦於軍

務有益著將此傳諭策楞舒赫德公同商酌辦理○諭策楞舒赫德色布騰薩喇爾著於十月間來京商議明年進兵之事軍營不可無總統之人額林沁多爾濟人尙去得辦事勤慎策楞來時將軍印務著額林沁多爾濟暫行署理兆惠著授爲參贊大臣協同額林沁多爾濟辦事阿睦爾撒納來時策楞等一同起程赴熱河陸見兆惠將本年所運糧米起運後卽赴軍營著寄信策楞舒赫德兆惠等知之○辛丑諭軍機大臣等策楞等請將新降阿睦爾撒納等眷屬分駐於戈壁以內留其爲首台吉及兵丁等於軍營以備遣用已將辦理錯謬之處指示斥駁此事策楞舒赫德不知是何居心乖張謬戾實爲朕所不料卽云一時錯誤亦不應出平情理至於此極試思遠方歸順之人尙未知內地作何安插乃甫經歸命卽將其父母妻子發遣留伊本身軍營伊心豈有不生疑

懼不知將伊眷屬作何發落今策楞舒赫德等辦理軍營重務其  
意止欲安居無事若將此等新降之人未經承受朕恩以前卽如  
此處置儻或心生怨望激成事端伊二人又將如何辦理卽爲籌  
畫伊等口糧起見亦當請旨暫爲酌撥若因口糧一時不至則遷  
移如許戶口又豈能不支給牲畜行糧見在更如何辦給乎卽或  
不然俟阿睦爾撒納到卡以後公同商議再行奏請亦不爲遲乃  
亟亟奏聞且云一面已經辦理聞之實可駭異總因策楞舒赫德  
全無勇往辦事之心一味畏葸怯懦必欲壞國家大事其居心尙  
可問耶伊二人究係何人主見著卽明白回奏若以公同商議含  
糊掩飾斷難逃朕洞鑒○癸卯諭軍機大臣等據策楞奏阿睦爾  
撒納見努三青滾維卜告稱同伊投降人內有落後千餘戶懇求  
遣兵迎接策楞等聞知此語卽應速爲辦理乃奏請俟明年大兵

進勛時再行籌辦所見甚屬舛謬此等落後之人俟至來年安能保其無意外之事阿睦爾撒納懇切求救情實可憫策楞等縱不能卽行迎出亦應將卽往迎接俟明年辦理之處具奏請旨乃竟顯言推諉一味畏難何以示懷柔遠人之意此又必係舒赫德之主見策楞諸事隨聲附和伊二人深負朕簡用之恩殊出情理之外不勝憤恨業經降旨令薩喇爾領兵迎接著速傳諭策楞等將此旨令阿睦爾撒納薩喇爾公同觀看會商或卽帶領阿睦爾撒納之兵給以馬匹口糧一同前往但不必令阿睦爾撒納親行並傳諭阿睦爾撒納大皇帝念爾初到勞苦暫爲安息且已遣侍郎玉保前赴軍營帶往熱河召見封爵筵宴諸事俱照車凌等之例加恩若親往迎接卽不能如期瞻仰惟令其差親信台吉宰桑等會同薩喇爾前往速爲迎接其如何議辦之處卽行奏聞策楞

舒赫德辦理畏怯不堪著嚴行申飭○甲辰改湖北鄖陽協隸襄陽鎮○丙午諭舒赫德自去年命往北路軍營所辦諸事動輒乖張其查拏瑪木特擅入邊卡一案有準噶爾扎努噶爾布差人投書詢問舒赫德並不奏聞請旨竟擅自致書達瓦齊其舉動冒昧實出意外朕彼時降旨嚴行申飭及來京時面加訓諭伊亦自知錯謬因未行治罪嗣車凌車凌烏巴什歸誠知準噶爾篡奪相仍人心離散實有可乘之機特命策楞爲定邊左副將軍並令舒赫德協同辦理舒赫德在熱河面領訓誨指授極爲詳明伊二人自到軍營畏蕙猜疑毫無籌畫凡所部署事事不合機宜卽如準噶爾輝特台吉阿睦爾撒納與達瓦齊結釁攻擊率眾四千戶約二萬口投誠內向白宜加意撫綏以示懷柔之意乃策楞舒赫德於阿睦爾撒納尙未接見卽議令將伊兵壯屯駐軍營同來眷屬悉

移置於戈壁之南相距數千里使其父母妻子分析離居此豈在天理人情之內在阿睦爾撒納等甫經歸命焉知天朝之將伊等分遣安插究屬何意斷不能不生疑畏且並不候旨竟稱一面奏聞一面辦理此何等重大事而率意妄行乃爾耶至阿睦爾撒納稱有德濟特台吉率眾一千戶亦傾心向化因爲水所阻又阿睦爾撒納之胞兄並其親子爲瑪木特拘留求其給與口糧馬匹前往救應接取青滾雜卜薩喇爾努三俱以爲可行而策楞舒赫德堅執不允薩喇爾係熟悉彼處情形之人旣以爲可行伊二人必欲執拗不知其出何肺腑方今準夷疊遭內亂所屬部落叩關內附者接踵而至此正可以大示懷柔永牧邊境之時策楞舒赫德身膺重寄何顛倒舛謬至於此極蓋舒赫德因朕有十月間令伊等進京之旨遂一切苟且辦理其不肯接濟阿睦爾撒納者恐致

遷延不得歸家之故且前次致書達瓦齊一事朕未加重譴又自以同列大臣才具大率與彼相若而伊親信已久卽辦理不當不過申飭議處未卽有可代其任者策楞雖素性羈率胸無定見乃亦竟每事附和毫不顧事理之輕重國家簡用大臣寄以專閫重任而乖戾僨事如此實爲深負朕恩策楞舒赫德俱著革職若卽令回京轉得悠然事外適合本心著以閒散在參贊上效力贖罪所有家產俱著抄沒其子特通額舒常俱著革職發往黑龍江披甲在京諸子著拏交刑部以爲大員負恩者戒班第著補授兵部尙書馳往軍營署理定邊左副將軍印務步軍統領員缺卽著阿里衮補授○停止四川松潘鎮總兵出口化導

八月戊申朔命江蘇截留漕糧十萬石備賑○辛亥實授楊應琚兩廣總督○壬子諭將軍阿蘭泰著赴軍營帶兵盛京將軍事務



著清保署理達爾黨阿著授爲黑龍江將軍亦令帶兵前往軍營  
○諭軍機大臣等策楞等奏稱投誠之輝特台吉阿睦爾撒納訥  
默庫等於明歲進兵時願將伊等屬下人內派兵二千三百餘名  
等語著照所請准其派出所派喀爾喀兵原定爲六千兵著裁去  
三千五百名令其看守遊牧○癸丑諭軍機大臣等準噶爾之瑪  
木特前因衝入邊卡經達清阿拏獲帶回軍營朕以非軍威所獲  
特施恩放回瑪木特應卽感恩歸降否則亦宜安靜居住乃遣鄂  
勒哲依哈什哈等來告卡上侍衛等瑪木特必來歸降又約阿睦  
爾撒納同來今阿睦爾撒納業已歸降而瑪木特反擄掠阿睦爾  
撒納遊牧殊爲狡詐卽應以此稱兵問罪可寄信薩喇爾卽會同  
阿睦爾撒納定議擒拏此時瑪木特若來歸降尙可施恩若再觀  
望定當擒拏治罪但阿睦爾撒納若去十一月有誤入覲令薩喇

爾與眾台吉前往此次策楞舒赫德斷不可去彼二人業以退縮  
誤事若有一人冒昧同行朕必將其卽正軍法要之瑪木特罪雖  
應問但時已稍遲今可否進兵之處薩喇爾阿睦爾撒納會同酌  
議惟期於事有益勿拘朕旨○甲寅 上駐蹕吉林以將軍署爲  
行殿至丙辰皆如之○乙卯 上詣溫德亨山望祭 長白山神  
○祭 松花江神○命舒赫德會同唐喀祿照管阿睦爾撒納遊  
牧事○丙辰 上奉 皇太后渡松花江幸龍潭○諭策楞之子  
特清額特成額特崇額舒赫德之子舒安俱未及十歲著加恩免  
交刑部○丁巳召鄂容安赴行在以尹繼善兼署兩江總督○諭  
軍機大臣等年來準夷內亂頻仍人心離散屢有大隊輸誠內嚮  
正可乘機辦理永收邊境而策楞舒赫德二人遇事乖張怯懦深  
負委任已降旨革職一時未得更替之人因命尹繼善速赴行在

欲令其前往北路今思尹繼善年逾六旬且此事亦恐非其意所欲辦徒致勉強債事又且可惜失內地一因循有名解事之人因思鄂容安年力壯盛深感朕恩勇敢有爲於一切緊要機宜或尙能曉暢克勝此任見已有旨諭部著速赴行在所有兩江總督事務著尹繼善暫行兼署矣鄂容安奉到此旨卽刻馳驛速赴行在面領指授將此併諭尹繼善知之○乙丑阿睦爾撒納進礮九位優詔卻之○丙寅 上閱輝發城○丁卯諭據策楞舒赫德覆奏阿睦爾撒納來降帶來四千餘戶內有在遊牧一千餘名因其可用欲留在軍營效力其台吉內有應來京入覲者故亦欲留在軍營並非有心分散伊等妻子等語從前策楞舒赫德奏請將新降台吉及伊等之子留在軍營又將伊等之老幼妻子移送蘇尼特地方辦理乖謬經朕嚴行申飭乃復巧爲奏辨更屬可惡朕前將

策楞舒赫德之子免其監禁今伊等有意貽誤軍機著將伊等幼子仍交刑部監禁○命阿睦爾撒納游牧移至鄂爾坤塔密爾居住○賞阿睦爾撒納訥默庫班珠爾並屬下兵丁辦裝銀兩○戊辰諭軍機大臣等昨策楞舒赫德見朕七月二十六日申飭之旨將阿睦爾撒納訥默庫車凌等兵並派七千欲於十月內起程征剿烏梁海等策楞舒赫德何始終執迷至於此極初阿睦爾撒納求助時正好進兵乃策楞等阻止未行至經朕嚴飭伊等若卽選精銳兵丁二三千名前赴尙不致誤今明知時已遲誤反欲派兵七千於十月進剿設照伊等所請不獨今日空勞兵力於明歲進兵更屬無益伊二人之心實不可問且阿睦爾撒納車凌俱係甫經投誠之人派阿睦爾撒納之兵救伊親屬尙屬可行若訥默庫係與阿睦爾撒納同來亦應救助今派車凌帶兵前往何意阿睦

爾撤納將來不過封親王車凌見係親王肯爲阿睦爾撒納所使乎辦理實不可解策楞舒赫德見朕二十九日所降之旨若於此時帶兵二三千名前往尙可車凌之兵斷不可帶既已起程亦令撤回若未經起行卽宜停止可寄信班第等專心籌畫明歲進兵之事妥爲辦理並傳諭阿睦爾撒納知之○己巳以舒明爲左副都御史由副都統遷○癸酉諭軍機大臣等從前降旨令貝勒車凌孟

克色布騰同王車凌領兵一千前往阿爾台策應今思車凌烏巴什訥默庫俱屬年幼車凌孟克俱舊人經理事務若遣往西路於事有益著將車凌孟克遣往西路在參贊大臣上行走車凌烏巴什訥默庫著照車凌孟克一體在參贊大臣上行走其從前西路派出綠旗兵一萬名內著傳諭永常卽行裁減三千名○乙亥諭軍營參贊大臣太多互相推諉無益於事除見在參贊行走之蒙

古王公等外北路著達爾黨阿烏勒登努三兆惠西路著薩喇爾  
阿蘭泰玉保爲參贊大臣其餘俱爲領隊大臣

九月丁丑諭據阿里袞奏稱德保差竣回京在家住宿一夜次日  
起程等語德保係御前侍衛差竣回京先至其家住宿殊屬無恥  
著革去公爵作爲三等侍衛在乾清門效力行走○戊寅諭策楞  
公爵著尙書達爾黨阿承襲德保公爵著郎中德祿承襲○己卯  
命奉天水災地方恩旨蠲免外仍分別優恤○辛巳 上奉 皇  
太后率 皇后謁 永陵○閏興京城○壬午行大饗禮○乙酉  
諭據班第等奏稱台吉阿睦爾撒納訥默庫班珠爾內訥默庫與  
車凌烏巴什骨月同居應卽用車凌烏巴什旗分旗纛阿睦爾撒  
納班珠爾應賞用何旗旗纛之處請旨遵行等語訥默庫著照所  
請卽令用車凌烏巴什旗分旗纛阿睦爾撒納著賞用鑲黃旗旗

蘇班珠爾賞用正黃旗旗纛俟派定伊等兵丁數目之後交該部  
照賞給車淩旗纛式樣製造由驛解往○丙戌謁 福陵 昭陵  
○丁亥行大饗禮○ 上奉 皇太后駐蹕盛京○吏部議准署  
山東巡撫郭一裕奏東平所與東平州駐紮同城東平州改隸泰  
安府東平所仍屬兗州府體制未協應改歸泰安府轄蘭山縣元  
宵屯坐落泗水縣境應改歸泗水縣轄從之○戊子 上御崇政  
殿受賀賜羣臣及朝鮮使臣準噶爾輸誠之宰桑等宴○ 御大  
政殿賜宗室覺羅等宴○諭免奉天府屬本年地丁錢糧其經過  
地方已免十分之三及被水應蠲額賦准於明年補免自山海關  
以外及甯古塔等處已結未結死罪均減等軍流以下悉予寬免  
○諭此次盛京禮部豫備一切祭器俱甚潦草且多錯誤朕親詣  
尙且如此尋常祭祀尙可問乎 陵寢事宜所關甚重世臣係專

司大員且係滿洲世僕並不竭盡誠敬草率辦理殊失滿洲臣僕敬事之意非尋常過失可比世臣著革職發往黑龍江效力贖罪

○調卡塔海爲盛京禮部侍郎以勒克兼理盛京戶部侍郎事由

都統兼理

○己丑免盛京各莊頭本年倉糧及興京等處本年米豆草

束之半並免各莊丁應完丁米○庚寅諭盛京爲我朝龍興重地自定鼎以來設立五部侍郎及奉天尹丞等官分理庶政教養旗民責任甚重且距京師僅千有餘里方今天下一家卽在漢人中猶不應稍存擇地之見況滿洲世僕豈可遂忘根本世臣本屬庸材竊通腐妄徒以資深擢用至盛京禮部侍郎乃其詩橐中至有霜侵鬢朽歎途窮之句幾自擬於蘇軾之謫黃州自思以彼其品其學與蘇軾執鞭將唾而筆之且則貳崇階有何途窮之歎又云秋邑招人嬾上朝寅清重秩自應夙夜靖共乃以疏嬾鳴高其何



以爲庶寮表率又云半輪明月西沈夜應照長安爾我家獨不思  
盛京固我豐沛舊鄉耶世臣居心不可問如此則昨之革職發遣  
尙屬輕典夫縱情詩酒最爲居官惡習以滿員而官盛京尙抑鬱  
無聊形諸吟詠則從前漢人之以出關爲畏途又不足怪矣此地  
風俗素醇甚恐爲此輩所壞嗣後盛京各官當深以此爲戒其有  
不思敬供厥職妄以詩酒陶情廢乃公事者朕必重治其罪可將  
此旨各書一通懸之公署令觸目警心永垂炯鑒○辛卯 上謁  
文廟○賞哈密貝子玉素布銀三百兩○壬辰諭阿睦爾撒納  
之盟著賜號輝特額爾德尼諾顏部落班珠爾之盟著賜號和碩  
特消伊扎固爾圖部落訥默庫乃杜爾伯特台吉與車凌等同一  
部落著亦賜號賽音濟雅哈圖部落○甲午 上奉 皇太后率  
皇后白盛京回鑾○諭朕由吉林至盛京周覽山川形勝敬稽

實錄所載仰見

列祖締造艱難維時宗室諸王克奮忠勤功

成百戰開國翊運之勳彪炳簡冊深切景念思盛京爲龍興重地  
國初諸王功烈懋著如此並宜建祠以酬舊勳而示來許此地見  
有怡賢親王祠應將

太廟配享之通達郡王武功郡王慧哲郡

王宣獻郡王及禮烈親王饒餘敏親王鄭簡親王穎毅親王一併

崇祀卽命曰賢王祠令所司春秋致祭應行典禮該部詳議奏聞

祠內碑亭可移於正中鐫勒此旨永昭我朝宗功元祀之鉅典尋

議盛京怡賢親王祠正室五間請於室內分設三龕每龕安奉三

位中龕中奉通達郡王左武功郡王右慧哲郡王左龕中奉宣獻

郡王左禮烈親王右饒餘敏親王右龕中奉鄭簡親王左穎毅親

王右怡賢親王每龕各設一案每案用羊一豕一果實五盤尊一

鑪一鐙二每位爵三素帛一

欽定祠名

上諭碑文及神牌清

漢字樣交內閣翰林院繕寫送盛京工部製造鐫刻移建碑亭及祠內所供龕案爵尊鑪鐙帳幔並交敬謹辦理每歲春秋二季令奉天府府尹承祭讀祝贊禮用盛京禮部人員神牌入祠日先期開列盛京五部侍郎職名奏請遣員讀文致祭從之○諭鄂寶身為府尹修理御路草率尙可寬恕隨圍人等屢經降旨不許地方官稍有餽送今知縣富昌復爲嚮導人等豫備飯食馬匹此雖由嚮導處索取亦伊等有意逢迎鄂寶著交部嚴察議奏嚮導人等擅受地方供應物件嚮導大臣著一併交總理行營大臣察議具奏○以武忱爲陝西布政使吳士功爲陝西按察使

由山東鹽運使遷

○

丁酉諭軍機大臣等據班第等奏稱拏獲準噶爾烏梁海遣來二人詢問伊等住處命薩喇爾努三掩其不備分路進攻並詢問齊木庫爾所屬之烏勒木濟瑪木特見住奇蘭地方巴朗見住哈喇

額爾齊斯地方辦理烏梁海之便應乘勢擒拏瑪木特巴朗已令薩喇爾努三等疾速進兵等語烏梁海於今春驅逐之時詭稱來降乃復搶擄阿睦爾撒納遊牧情殊可惡班第命薩喇爾等掩其不備攻擄甚合機宜巴朗瑪木特遊牧地方俱不甚遠於辦理烏梁海之便如能拏獲甚屬妥協朕佇待捷音再班第等奉朕今年暫停進兵諭旨以冒昧進兵請罪前因策楞舒赫德坐失事機欲以七千人大隊並進是以令其暫停進兵今乘時進攻烏梁海瑪木特巴朗所居地方俱相接連可以一鼓成事不必拘朕前旨此旨到時伊等諒亦成功可仍令薩喇爾前赴熱河著並寄諭班第知之○庚子 上詣 北鎮廟行禮○辛丑諭班第著授爲定邊左副將軍鄂容安著授爲參贊大臣協同班第辦事○壬寅諭軍機大臣等班第等奏稱拏獲烏梁海之宰桑車根等及收服伊等

屬下人所獲牲畜數萬等語可寄信於班第令其詢問班珠爾阿睦爾撒納等所獲人內有伊等屬下人及牲畜物件俱令給還其餘酌量賞與效力人等駝隻馬匹進兵需用最爲緊要著用心牧養以備來歲之用至所獲臨時未曾抗拒之宰桑等應向內移徙或於軍營或於車凌之游牧安置惟期辦理妥協抗拒之宰桑得木齊等著卽行正法其餘屬下人等著班第明白曉諭仍令本處安置其如何照管伊等之處酌量辦理今乘此機會迅速往擒巴朗瑪木特如能拏獲於明年大兵進發大有裨益從前朕以班第雖屬曉事未必卽能勇往辦理今遵朕指示諸事妥協甚爲可嘉班第已授爲將軍著將此次出力之王公台吉大臣官員兵丁等查明具奏交部議敘新降之厄魯特等甫經投誠卽如此效力所有應赴熱河之班珠爾扎木參等俟事竣卽與薩喇爾一同前來

到時另行施恩再喀爾喀等俱知改前非鼓舞奮勉貝勒青滾雜  
卜公車布登扎布恭格敦丹等成功後亦卽與班珠爾扎木參一  
同馳驛前赴熱河再加恩賚○癸卯命瑪什巴圖巴圖孟克赴西  
路軍營○甲辰諭軍機大臣等據班第等奏此次所獲烏梁海內  
係阿睦爾撒納屬下俱行給還抗拒者正法擒獲者賞給有功人  
爲奴歸順者安置特斯等處居住同舊烏梁海一體當差所得馬  
匹換給往擒瑪木特兵丁其餘馬匹牲畜賞給新厄魯特以資養  
贍等語班第將所獲烏梁海等馬匹換給往擒瑪木特兵丁向前  
進發甚合機宜至歸順之烏梁海若皆留本處安置恐有未便可  
寄信班第照朕前旨令宰桑得木齊內徙其屬下人等命伊等舉  
可以約束眾人者留本處管束否則安置卡座近處亦可但使其  
不致逃避而已餘著照班第所請行

冬十月丙午朔班第等奏九月初參贊公車布登扎布等自科布多河見有烏梁海蹤迹分兵前進擒宰桑車根等及屬下人三十餘口參贊烏勒登亦帶兵於索郭克地方接應參贊薩喇爾計擒四五十人獲馬牛羊甚夥又參贊努三等帶兵至赤倫所居吹地方捕獲宰桑赤倫及所屬四得木齊家口又將雅爾都所屬一得沁家口擒獲詢問瑪木特蹤迹據稱八月間往額爾齊斯等語臣等見將所獲烏梁海等解送內地投順者留其妻子給牲畜居住所獲子女牲畜俱送入卡內其阿睦爾撒納屬下被擄子女今奪回者卽給與報聞○己酉以明德爲四川布政使梁翥鴻爲湖北按察使由雲南池西道遷○辛亥命各省巡道稽查州縣自理詞訟○甲寅李錫秦因病解任調衛哲治爲廣西巡撫鄂樂舜爲安徽巡撫以周人驥爲浙江巡撫調葉存仁爲浙江布政使以阿爾泰爲河

南布政使盧憲觀爲山東按察使

由湖北荆宜施道遷

○乙卯調阿爾泰爲

山東布政使圖爾炳阿爲河南布政使

○丙辰

上奉

皇太后

還宮○戊午召見諸王滿洲大臣等諭曰今日召見爾等特爲曉

諭辦理平定準噶爾及滿洲臣僕昔年勇敢邇來怯懦之故準夷

乃極邊小醜從前台吉噶爾丹策零肫然遣使奏請貿易朕爲中

外共主示以柔遠之仁准其所請俾獲微利暨噶爾丹策零歿後

伊子策妄多爾濟那木扎勒承襲台吉頗肆兇暴喇嘛達爾扎因

弑奪之然策妄多爾濟那木扎勒係噶爾丹策零之子喇嘛達爾

扎亦名爲噶爾丹策零之子朕於準噶爾初無利其土地人民之

念而彼又極恭順朕是以置之度外任其存留而已今達瓦齊係

噶爾丹策零屬下之人獲罪於喇嘛達爾扎逃入哈薩克潛來原

游牧處戕弑喇嘛達爾扎奪據台吉朕果貪取其地乘伊之亂何



難興師問罪惟是準噶爾究屬邊夷達瓦齊誠能守分遣使乞恩  
朕亦必加容恕是以杜爾伯特台吉車凌等投誠朕尙遣人於黑  
龍江等處勘視通肯呼裕爾地方安置伊等並無用兵之意不意  
達瓦齊今歲遣使敦多克等以闡揚黃教休養眾生假辭陳奏則  
其意竟欲與朕相埒達瓦齊弒君悖亂詎可以鄰國自居且今歲  
輝特台吉阿睦爾撒納等又領數萬眾投誠朕以天下大君焉有  
求生而來者不爲收養之理轉致被達瓦齊戕害夫收之則必養  
之若令附入喀爾喀游牧非惟喀爾喀等生計窘迫數年後必有  
起釁逃避之事則喀爾喀等轉受其累矣况達瓦齊作亂之人今  
卽收其數萬眾雖目前不敢妄舉而日久力足必又蠢動侵我邊  
圉與其費力於將來不若乘機一舉平定夷疆將車凌阿睦爾撒  
納安置原游牧處使邊境永遠甯謐之爲得也然準噶爾之事自

皇祖

皇考時頻煩

聖慮

歷有年所因機無可乘故大勲未

集今事機已值無煩大舉以國家之餘餉兩路並進不過以新降厄魯特之力少益以內地之兵即可成積年未成之功諸王大臣宜各奮勵踴躍從事再漢大臣等原未與議今滿洲王大臣內惟大學士傅恆奏請辦理其他盡畏怯退縮恐生事端卽如策楞舒赫德當初因不願辦理是以於噶爾布來札虛詞恐嚇舒赫德遂張皇失措擅自移文達瓦齊與之講和當阿睦爾撒納新來投誠時策楞舒赫德卽使伊等寒心又令其妻子離散內徙男子留於軍營及阿睦爾撒納請兵救援後至之人又妄爲攔阻彼時朕若不速降諭旨將舒赫德策楞治罪則新投誠之人迫切變生不特當時僨事而策楞舒赫德亦不能自保矣策楞雖惑於舒赫德之言然伊爲將軍咎有難辭故將伊二人俱行治罪因朕如此辦理

伊等始延餘生耳此在怯懦諸臣或妄以伊等爲可矜者有之無識之言更何足據朕此次恭謁 祖陵臨幸故土徧歷山河形勢恭閱 實錄仰見 祖宗創業維艱而諸王貝勒大臣官員等輔佐亦爲不易總因彼時滿洲等勇於行陣臨敵敢先故由盛京龍興統有天下至今百有餘年受無窮之惠爾等皆功勳後裔蓋思效法前人報國立功而惟守妻孥以求安逸聞戰陣而甘退縮朕於此不無深憾焉朕嘗觀明史當其國勢衰微蒙古宰桑額森率眾侵擾明國受其挾制凡額森所言卽勉強奉行然額森自伊主布哈汗被弑後額森欲自稱汗遣使於明明之臣工率多附和其中請仍稱額森爲太師毅然執奏者僅二三人前明君臣皆漢人又值衰微之際尙能持正不稍寬於叛逆况朕滿洲主后統臨天下當國家昇平強盛之會滿洲臣僕自應奮勉從事何所畏憚而

餒怯若是總之朕總理天下諸務惟據理獨斷應辦之事斷不爲眾所阻撓如其不可眾雖強爲奏請朕亦斷不允行是皆爾等所共知者此用兵要務朕籌之已審豈以眾人怯懦卽失機宜半途而廢但滿洲臣僕習氣至於此極朕若姑息因循不速爲整頓振興舊俗數年後不知何所底止也故召爾等降旨開導將此宣示八旗大臣官員以及兵丁等知之○庚申賜顧麟等五十九人武進士及第出身有差○丙寅 上幸西廠閱出征兵賜健銳營官員等飯○戊辰調嵇璜爲吏部侍郎裘曰修爲戶部侍郎○調吳達善爲工部侍郎以雅爾哈善爲兵部侍郎由署戶部遷○辛未命阿勒楚喀駐防兵丁增設副都統一協領一每年加賞農具銀兩俟二十年後停止○吏部奏嵇璜見由戶部左侍郎調補吏部右侍郎例應以左侍郎管右侍郎事至吳達善調補工部侍郎裘曰修

調補戶部侍郎應否將見任右侍郎三和劉綸各轉補左侍郎或卽以吳達善襄曰修補授之處請旨得旨三和著轉補工部左侍郎劉綸著轉補戶部左侍郎其由五部左侍郎補授吏部右侍郎仍以左侍郎管右侍郎之例實屬繁文著停止並交會典館改正

○以鄂彌達署吏部尙書

由本部侍郎署

○王申諭據富勒赫奏高斌張

師載多用公項銀六萬餘兩應著落前任河庫道何煇李宏名下追賠等語何煇李宏職任河庫道專司錢糧豈容蒙混開銷擅動公項藉以彌補虧空是高斌張師載爲南河之罪人而此二人者又高斌張師載之罪人也所有高斌張師載多用公項銀六萬餘兩卽著落何煇李宏名下追賠著交與尹繼善將何煇李宏拏交工次監追予限二年如逾限不能完繳卽照陳克濟等之例正法

○癸酉諭班第自到軍營以來辦理諸事均合機宜奮勇果斷是

以先經進兵擒拏阿爾台以內居住之準噶爾烏梁海宰桑二人收戶口千餘今復遣兵由彼越索勒畢嶺進至布拉罕之察罕托輝額貝和碩地方將準噶爾宰桑庫克新瑪木特通瑪木特悉行擒獲收厄魯特兵一百五十餘名我兵並未傷損一人此皆班第實心奮勉調遣合宜所致深屬可嘉班第著賞給世襲子爵補授正黃旗領侍衛內大臣仍賞銀一千兩薩喇爾感戴朕恩遇事奮勇效力此次皆由伊首先進取克成此功尤當加以殊恩薩喇爾亦著賞給世襲子爵補授正白旗領侍衛內大臣至所賞世職或兼於本身或令伊子承襲之處令伊等自行酌定具奏○諭此次辦理烏梁海及擒拏瑪木特諸事因策楞舒赫德有心畏縮阻撓軍務是以將伊等革職伊子俱交刑部監禁無知之徒尙有以幼兒爲可憫者今班第到軍營以來遵朕諭旨相度機宜奮勉進兵

收獲烏梁海二千餘戶詢知兩瑪木特居址奮勇衝寒而進不致一名漏網俱被擒獲則二人從前畏縮無能種種悖謬之處愈覺可恨伊二人之罪俟班第審明具奏時再行定奪外策楞之子特英額著發往莊浪特昇額發往江南特清額發往杭州特成額發往西安特嵩額發往青州舒赫德之子舒甯發往涼州舒安發往成都披甲效力贖罪○諭軍機大臣等據班第等奏稱薩喇爾帶兵將兩瑪木特俱已擒獲並獲扎哈沁噶勒雜特兵丁百餘名仍飭薩喇爾一面辦理收服扎哈沁包沁游牧人眾一面躡緝擒捕巴朗等語此皆 昊蒼默佑班第薩喇爾眾王公台吉共相奮勉之所致已降旨將班第薩喇爾俱賞給子爵世襲罔替其餘出力人員俟班第查奏到時再行加恩至喀爾喀官兵此次甚屬奮勉亦著查明賞賚其職分較大人員至熱河時朕另行加恩將此宣

諭伊等至班第奏請此次擒獲噶勒雜特包沁之厄魯特一百五十餘名開示恩德釋放遣還所奏甚是此後伊等互相傳播準夷合部人眾必將感戴朕恩於來年進兵事宜大有裨益班第等宜將朕憫其隻身被獲不忍其父母弟兄妻子分離是以釋回令其骨肉完聚之處明白宣諭酌賞口糧遣還再擒獲之得木齊達什敦多布不必羈禁在彼亦著同兩瑪木特解送前來如已經派人解送兩瑪木特達什敦多布著另行解送來京至烏梁海宰桑都塔齊一切差遣無不奮勉此次往說瑪濟岱之便收服烏梁海十八戶著不必另行查辦可傳諭賞伊○甲戌諭大學士等準噶爾本元朝臣僕竄處西北特其荒遠憑陵番部我皇祖聖祖仁皇帝三駕親征肅清沙漠皇考世宗憲皇帝時策妄阿喇布坦父子濟惡仍肆跳梁是用命將出師聲罪致討及朕嗣統當皇



考降旨撤兵之後而噶爾丹策零遵守定界遣使請安求通貿易朕特加恩俯准以示懷柔迨噶爾丹策零物故其子策妄多爾濟那木扎勒爲孽兄喇嘛達爾扎所弑而喇嘛達爾扎復爲達瓦齊所弑在喇嘛達爾扎雖承緒不正尙屬噶爾丹策零之子至達瓦齊則篡竊亂臣耳乃今年夏閒遣使來京仍請赴藏熬茶覲然以噶爾丹策零自處試思堂堂大清中外一統而夷部亂臣妄思視同與國此其逆天悖理爲何如耶上年杜爾伯特台吉車凌車凌烏巴什等率眾來降今秋輝特台吉阿睦爾撒納等又舉部內附斯均窮蹙來歸之人朕爲天下共主兼覆並載旣無拒而不納之理而喀爾喀內地俾此輩數萬眾仰食聚處將來滋生蕃庶亦豈久安善策朕於達瓦齊初無興師問罪之意而事會所至揆之理勢實有不得不從長經理者昔 皇考初議撤兵籌畫尙在未定

予蒙 召同果毅親王等及軍機大臣等 咨度再三並諭以此  
時不罷兵則成功尙未可期此時若遽罷又恐後人以爲墮已勞  
之功彼時予議以當罷爲請 聖意乃定二十年來邊圉晏然甲  
兵不試固朕初心卽車凌等始至時朕尙無意及此奈達瓦齊眾  
叛親離叩關踵至此皆 上蒼默佑有不期然而然者我滿洲舊  
俗尙義急公一聞用兵無論老壯咸以不得與爲恥承平日久習  
於晏安環甲執兵衝鋒陷陣不免視爲畏途然以應行之事值可  
乘之時而牽於浮論坐失機宜朕亦斷斷不肯出此也從前策楞  
舒赫德辦理北路軍務乖張怯懦種種不合皆由存畏難之見思  
以退縮自全是以重治其罪今班第奉命前往奮勇果斷旬月之  
閒收獲烏梁海數千戶口牲畜甚多又將準噶爾宰桑庫克新瑪  
木特通瑪木特悉行擒獲又得戶口牲畜無算使策楞舒赫德於

七八月閒卽能如此其成功豈不更爲迅速亦必有不僅止於此者班第薩喇爾已俱授爲領侍衛內大臣並各賞給世襲子爵以爲大臣實心任事者勸策楞舒赫德應得之罪俟班第議奏到日另行降旨其在京諸子及歲者俱發往各省駐防披甲當差朕辦理政務信賞必罰一秉至公毫無成見亦並不爲悠悠之論所奪特將此番用兵始末及在事諸臣功罪宣示中外知之○雲貴總督碩色等奏據永昌府稟報緬甸國王莽達喇被所轄之得冷子攻破阿瓦大城該國王逃避無蹤茲訪得該國大和尚撒納情同大頭目捧奪貌等辦事不公得冷子怨恨率眾將阿瓦大城攻破該國王見避海濱其國王二子在所屬之猛迺地方均未回國報聞

十一月丙子朔諭軍機大臣等著寄信班第等詢問通瑪木特爾

若誠心歸降宜將爾眷口並屬下人等接取前來再說降噶爾雜特不但許爾等無罪大皇帝必當格外施恩一面將通瑪木特同解來京若已自軍營起程扎拉豐阿卽遵旨將伊如何登答之處作速移咨班第辦理○戊寅 上幸南苑行圍○蘇祿國王蘇老丹嘛喊味麻安柔律噶遣官表進方物並請入附版圖得旨覽王奏進貢方物具見惻忱知道了爾國遠隔重洋輸誠向化良可嘉尙所請將疆土人丁戶口編入中國之處已允部議毋庸齎送圖籍已有旨了○己卯諭每年自十一月初一日爲始祭祀朝集俱穿貂鑲朝衣端罩著爲令○諭軍機大臣等各省怡賢親王祠設立已久後浙江等省有改爲關帝廟者所辦甚是各省俱宜照此於後殿安設神牌而前殿或供神佛或供奉關帝神像俱可此亦無關政要不必張揚行所無事可耳著於各督撫奏事之便傳諭

知之○諭據班第等奏稱同兩瑪木特來歸之克爾努特台吉阿布達什原同伊弟巴圖爾帶領戶口前來因被哈薩克錫喇人等搶擄暫居扎哈沁地方今因擒獲瑪木特前來歸誠等語阿布達什原與阿睦爾撒納等同來投順因馬力疲乏不前中途又被劫掠今據輸誠款附亦當加恩著傳諭班第酌賞阿布達什段匹並照扎薩克台吉職銜辦給行糧牲畜歸於阿睦爾撒納部內一併居住○庚辰加陝甘總督永常內大臣銜○癸未諭策楞舒赫德俱係身受重恩之人乃自到軍營以來畏懦退縮辦事乖謬朕原降諭旨令班第取具伊二人供詞奏到日再行治罪今覽班第奏摺伊二人自認重罪俯首無辭若論軍法當卽在軍營正法示眾但朕念其平日差遣奮勉在內廷行走有年著格外施恩免其正法仍留軍前效力贖罪至於明歲大兵進征之時策楞舒赫德俱

不必同往所有糧餉事務著派永貴溫福隨同辦理○以收服烏  
梁海功加貝勒青滾雜卜郡王銜公車布登扎布貝子銜○乙酉  
上啓鑾幸避暑山莊○丁亥輝特台吉阿睦爾撒納杜爾伯特  
台吉訥默庫等於廣仁嶺迎駕是日上駐蹕避暑山莊○戊  
子諭輝特台吉阿睦爾撒納杜爾伯特台吉訥默庫和碩特台吉  
班珠爾等皆準噶爾渠帥嚮慕德化率領二萬餘眾傾心來歸甚  
屬可嘉應施恩賞給封號以示懷柔至意阿睦爾撒納封爲親王  
訥默庫班珠爾封爲郡王杜爾伯特台吉剛多爾濟巴圖博羅特  
輝特台吉扎木參齊木庫爾封爲貝勒杜爾伯特台吉布圖克森  
額爾德尼羅壘原端輝特台吉德濟特普爾普克什克封爲貝子  
輝特台吉根敦扎布固木扎布杜爾伯特台吉布顏特古斯孟克  
博羅特和碩特台吉納噶察封爲公杜爾伯特台吉烏巴什伯勒

克輝特台吉伊什克特封爲頭等台吉均授爲扎薩克管轄  
所部人戶其如何編次旗分佐領補授官職之處著該部照例辦  
理阿睦爾撒納等受朕恩育務將各該屬人等慎加約束教養勉  
供厥職安分謀生爾等果能仰副朕心遵循訓旨則永沐朕恩於  
無既矣慎之毋怠○命杜爾伯特部落以親王車凌爲左翼盟長  
貝勒色布騰爲副盟長貝勒車凌孟克爲協理盟長郡王車凌烏  
巴什爲右翼盟長郡王訥默庫爲副盟長○以輝特親王阿睦爾  
撒納爲北路參贊大臣杜爾伯特郡王訥默庫爲西路參贊大臣  
○己丑加貝子車木楚克扎布貝勒銜○壬辰諭軍機大臣等班  
第等奏請將收服之扎哈沁人等遷至內地扎布堪庫克嶺等處  
居住此事斷不可行伊等如此辦理者特慮扎哈沁人內有存二  
心之人潛行逃竄又慮噶勒雜特哈薩克錫喇兵來搶奪之故此

皆未審事之機宜所慮殊屬過當我兵未收服烏梁海扎哈沁之前或恐新降人等逃往送信理宜防範今車凌阿睦爾撒納俱已來降又將烏梁海扎哈沁人等收服準夷全部早有見聞不但一二不足信之人逃往原不足惜即使洩漏信息彼知我收其屬部明年兩路進兵大加征剿不過愈加驚怯耳更有何慮若恐其遣兵搶奪卽達瓦齊發兵前來若人數不多我兵以逸待勞儘堪剿滅卽能以大力搶回扎哈沁不過如我未收扎哈沁而已於我未爲傷損而轉可以試看達瓦齊之力量明年易於進兵今方欲辦理準夷若將投誠之人均如此遷居內地明年進大兵時收服各部又將何以辦理乎著班第等將扎哈沁人等仍令居住齊拉罕地方斷不必移至內地○召班第來京陛見以阿睦爾撒納暫署將軍額駙色布騰巴勒珠爾協辦○命車凌同車凌烏巴什往西



路軍營訥默庫同阿睦爾撒納班珠爾往北路軍營○甲午以進  
勦達瓦齊宣諭準部詔曰誕告爾準夷有眾昔爾台吉噶爾丹策  
零祇服朕訓恭順無失朕嘉其誠篤二十年來疊沛恩施俾爾有  
眾各得休息逮策妄多爾濟那木扎勒承襲台吉朕復加恩悉如  
其舊乃策妄多爾濟那木扎勒賦性暴戾不恤其眾喇嘛達爾扎  
因而篡弑於時會欲代申天討殲此逆亂念噶爾丹策零後嗣惟  
有喇嘛達爾扎一人用是恩施格外未加勦除達瓦齊以噶爾丹  
策零臣僕敢行篡弑致噶爾丹策零後嗣滅絕且又殘害同人酷  
虐其下敗壞黃教悉令還俗朕念噶爾丹策零恪恭敬順事朕有  
年安忍視其宗滅地亡使衽席黎元流歸左道又值杜爾伯特台  
吉車凌車凌烏巴什輝特台吉阿睦爾撒納等不勝其虐率屬投  
誠朕君臨天下一視同仁車凌等瀝誠祈請朕焉有不收留撫養

之理是以特沛殊恩悉皆加爵晉秩其屬下宰桑亦予官職及銀  
段產畜俾得安居然使安置於喀爾喀地方不免侵占游牧互相  
雜處殊爲無益不若仍居舊地爲尤善也今爲爾眾兩路與師北  
路令將軍班第阿睦爾撒納西路命將軍永常薩喇爾率兵前進  
平定準部以爲車凌阿睦爾撒納人眾復業之所爾夷眾有車凌  
阿睦爾撒納族屬欲行內附者朕亦一體施恩其餘有眾如謂達  
瓦齊旣弑其主又絕人嗣思念大義不甘爲彼臣僕慕朕德化抒  
誠來降者朕亦同車凌阿睦爾撒納等一體撫恤使居原游牧處  
不令他徙總之先來者先受朕恩後來者後蒙朕惠即使達瓦齊  
痛改前非輸誠投順朕亦一體封爵不令失所爾等如不曉朕憐  
念夷眾喪亡溺於左道拯諸水火之意不知大義所在仍懷觀望  
或敢抗拒者大兵所至必盡殲除爾等其詳求朕諭熟思利害善

自裁擇勿遣爾悔爲此誕告○乙未 上自避暑山莊回鑾○以喀爾喀副將軍額林沁多爾濟爲西路參贊大臣○裁安徽臨淮縣歸鳳陽縣轄○丁酉諭據班第等奏將烏梁海人眾編設旗分佐領著照所奏率桑車根赤倫著授爲三品總管副都統銜察達克著授爲總管喀喇巴圖爾阿玉錫著授爲扎哈沁四品翼長俟庫克新瑪木特到時朕意欲授爲散秩大臣並補放總管至庫克新瑪木特等請令扎哈沁等在扎布堪等處屯田適據阿睦爾撒納奏定明年二月進兵卽在額爾齊斯等處屯田著瑪木特等卽往額爾齊斯耕種應需籽種著加恩賞給○准阿睦爾撒納暫回游牧命色布騰巴勒珠爾著將軍事○戊戌 上還京師○庚子諭軍機大臣等劉統勳等奏酌帶賞需一摺內稱準噶爾頭目如果果有交納軍器實心向化者應酌予賞資等語所奏非是準夷投

誠人眾所帶軍器若令其一一交納則是激之使反拒之使不來  
既阻其向化之誠復啓其疑貳之漸焉有如此辦理之法若果應  
行獎賞則當其率眾歸誠朕自有格外加恩之處如近日北路之  
阿睦爾撒納等來降何嘗不厚加寵錫如以其投降交納器械軍  
營將軍卽行議賞則是以我財幣賄誘來降幾似利其所有而爲  
之矣况橐載鉅萬而往是啓賊人以搶掠之門也此從前岳鍾琪  
等辦理錯謬豈可復踵前弊劉統勦原係漢人軍務非所諳練鄂  
昌外任年久乃亦漸染綠營惡習爲此陳奏甚屬不合著飭行至  
另摺奏五十六帶領察哈爾兵丁支領口糧火藥之處從前原議  
令其隨帶兩月口糧緩程前往其經過處所尙可打牲行圍以資  
口糧豈必按日計算且察哈爾兵丁從無操演之例卽應行操演  
者旣到彼處亦宜停止再無需用火藥之理明係五十六藉此希

圖侵冒貨賣劉統勳等據此辦理直爲伊所蒙蔽所有支領火藥  
著悉行追繳五十六如此居心豈可令在軍營已有旨拏交刑部  
著劉統勳等卽行派員押解來京○辛丑諭長蘆鹽政普福奏蘆  
東眾商情願捐銀三十萬兩稍充軍營賞需之用且援金川之例  
爲請此甚非是金川用兵適當朕普免天下錢糧千餘萬之後又  
值江南水災賑濟撫恤需用過多是以於兩淮蘆東浙閩等處各  
商之急公捐輸者不便阻其報效之忱俯允所請其實於軍需所  
費何裨萬一方今國家全盛府庫充實適當準夷投誠者接踵而  
至應籌其游牧俾令久安且彼內亂機有可乘此不過以餘力舉  
之已屬裕如而近年以來各省年穀順成倉儲豐美卽去秋淮徐  
諸郡被水成災賑恤所需亦不下數百萬而每歲冬季八旗兵丁  
諸賞資按例舉行並不因西北軍需於應用帑項稍存裁節之見

統計經費仍復有盈無絀何至遽以商捐爲請耶向來偶遇軍需災賑之事不知輕重之人多思藉以開例報捐然果籌餉採荒動煩經畫則捐輸踴躍原屬臣民忠愛之誠而此時則殊可不必況天地生財貴於流通庫藏所積旣多而臨事又復別籌取益殊非用財大道朕所不爲軍需所費邊境藉以流通卽內地商民亦均爲有益普福此奏所見甚小著傳旨申飭恐各省復有踵而行之者是用明降此旨諄切曉諭令內外諸臣共知朕意○命兆惠富德總理臺站

十二月丙午諭軍機大臣等據鄂昌奏噶勒丹多爾濟來降應備給口糧牲畜等項如有追兵前來並請發兵堵禦等語噶勒丹多爾濟如果實心來降一應賞賚之處自當豫行備辦但甫來之初尙不必急爲賞給俟伊等奏聞後朕自格外施恩其未奉朕旨以

前先行酌量接濟可傳諭鄂昌將伊帶來人眾一面安插一面派駐紮哈密章京索諾木看管噶勒丹多爾濟來京至噶勒丹多爾濟本係準噶爾台吉之大者隨帶人眾必多如準噶爾追兵前來令伊等自爲迎敵我不過聲援接應再撫恤來降之人斷不可令綠營兵丁過加防範致使伊等生疑○丁未諭刑部准駁案件關繫人命出入理宜加意詳慎向例有該部駁正准予議敘之條前直隸耿揚業踢傷李秀之母身死一案該部並未詳察據題率覆因命更正而該部遂有未經飭駁司員交部察議之語今楊錫紱奏人情畏處分甚於得紀錄恐嗣後心存成見必有不當駁而駁者是乃誤會不知朕本意以爲歷年刑部司官濫駁而濫邀議敘者不知凡幾今應駁而不駁獨不應處分乎是處分當駁而不駁乃所以杜不當駁而駁者也其實從前刑部司員以駁案濫邀議

敘者比比皆是而以不駁處分者始此一案耳楊錫綬尙誤會如此其他可知然天下事固不以一例槩之亦曰大公順應耳用是再行明諭內外問刑衙門知之○戊申以班第爲定北將軍阿睦爾撒納爲定邊左副將軍永常爲定西將軍薩喇爾爲定邊右副將軍○己酉予故廣西巡撫李錫秦祭半葬○庚戌命 永陵四大祭輪派盛京五部侍郎行禮○辛亥 上幸大學士來保予告大學士福敏第視疾○以親王固倫額駙色布騰巴勒珠爾親王銜琳沁郡王訥默庫班珠爾郡王銜青滾雜卜尙書公達爾黨阿總督伯鄂容安護軍統領烏勒登爲北路參贊大臣親王額琳沁多爾濟車凌郡王車凌烏巴什貝勒車凌孟克色布騰貝子扎拉豐阿公巴圖孟克瑪什巴圖將軍阿蘭泰爲西路參贊大臣○癸丑軍機大臣奏查設窖藏冰每年通州應運京城冰二千塊道里



較遠計塊予值不若卽在京取用之便見在龍堂蓮花池等處得冰甚多卽以通州應運之數就近增取其通州取冰之例應停再熱河等處乃巡幸駐蹕之地用冰無多請嗣後熱河藏冰定爲二千塊喀喇河屯三百塊巴克什營等七處各一百塊報聞○甲寅諭庫克新瑪木特著授爲內大臣在御前行走通瑪木特著授爲散秩大臣在乾清門行走庫克新瑪木特之子車凌達什得木齊達什敦多布俱授爲三等侍衛得木齊蘇珠克圖授爲藍翎侍衛○甲子命鄂容安赴西路協理臺站○命浙江杭嘉湖道甯紹台道兼管海防○乙丑命公哈達哈將軍阿蘭泰馳驛赴喀爾喀各賞銀三百兩○丙寅調阿蘭泰爲北路參贊大臣鄂容安爲西路參贊大臣○以內大臣瑪木特爲北路參贊大臣○癸酉諭大兵進發凡經過名山皆應敬謹致祭明年西北二路大兵進發平定

準噶爾地方問之薩喇爾瑪木特等北路經過阿爾台山珠爾庫  
珠山西路經過博克達山阿拉克山著交該衙門撰擬祭文交兩  
路前隊將軍等於大兵經過時敬謹致祭○諭軍機大臣等據班  
第奏稱與阿睦爾撒納會議明歲進兵額爾齊斯一摺阿睦爾撒  
納欲於明春趁準噶爾馬畜疲乏之際不能抗拒易於成功所思  
甚是瑪木特來時亦如此具奏朕因伊二人之言業降旨兩路皆  
定於明春進兵但見在軍營馬止有三萬六千餘匹明春遣往兵  
六千名以每名三馬計之須用馬一萬八千匹除疲弱不堪應用  
外如尙有可用者則多派數百名朕近遣哈達哈等赴喀爾喀挑  
選馬匹伊等若能多爲挑選則再派一二千名尤好惟度馬力辦  
理可也○是歲朝鮮琉球安南蘇祿來貢○會計天下民穀數各  
省通共大小男婦一萬八千四百五十萬四千四百九十三名口

各省通共存倉米穀三千一百二十一萬四千一百六十石三斗五升一合四勺零